

Te Kōrero Mō Tāmaki Makaurau

Te mauroatanga o ngā hononga ā-waka mō Tāmaki Makaurau ki te Raki

E tere whanake ana Tāmaki Makaurau ki te Raki. I tōna tikanga kia kaua e iti ake i te 41,000 ngā kāinga hou, i te 22,000 ngā tūranga mahi hou, i te 110,000 anō hoki ngā kainoho hou. Ko te nuinga o taua whanaketanga o ngā rā ki tua, ka ara ake ki roto o Silverdale, o Dairy Flat, o Wainui me Ōrewa.

Hei tautoko i te whanaketanga tāone mō ngā rā ki tua, me mātua whai a Tāmaki Makaurau ki te Raki i tētahi kōtuinga waka, e pai nei te hoahoatanga o tana whakaurunga. E whai ana mātou kia mauroa ngā kaupapa mō te waka kia haumarua ai, kia māmā ai, kia tautini ai hoki te hāereere a te katoa, ahakoa mā raro, mā te paihikara, mā te waka tūmatanui, mā te hautū waka rānei.

E whakarite ana mātou i tēnei wā tonu, nā te mea, e hirahira ana te manaaki i ngā whenua e tika ana mō te whakatū kaupapa i roto i te 20 ki te 30 tau e puta ai ngā whanaketanga. I tōna tikanga ka āta whakatauhia te whiwhinga o ngā tahua putea e ai ki ngā pae-tawhiti ā-wā mō te whakahounga me te tukunga o ngā whenua e te Kaunihera o Tāmaki i roto i te 10-30 tau e haere ake nei.

Hei tautoko i ā mātou whakamaheretanga, i te tau 2019, i āta tohua e Auckland Transport me Waka Kotahi NZ tētahi kōtuinga waka e aro nei tana rautaki ki te pae tawhiti. He mea waihanga i runga i te whai wāhitanga mai a te hapori, ā, kei roto ētahi kōwhiringa mō ngā haerenga poto me ngā haerenga roa ake kia puta ai tētahi rautaki mō te waka mā Tāmaki Makaurau ki te Raki e iti nei te hauhā. Nō konā, kua mātai te ohu whakahaere i ngā kōwhiringa maha mō ngā ara e whai wāhi ana ki te kōtuinga.

Ngā wāhanga matua o te kōtuinga waka mā Tāmaki Makaurau ki te Raki e mauroa ana:

- Kua māmā ake te whai wāhi ki ngā mahi me ngā rauemi hapori
- E ngāwari ana te neke haere a ngā tāngata me ngā rawa
- Te tuku atu i ngā kōwhiringa waka ka āki i te huringa ki ngā tūnuku korikori (te hīkoi me te kake paihikara) me ngā waka tūmatanui
- Te whakarite i tētahi pūnaha waka e haumarua ana ki ngā tāngata katoa
- Te whakaū i te hāngai ana te whakaurunga o te kōtuinga waka ki te whakamahinga o ngā whenua.

E mahi tahi ana mātou ko Te Kaunihera o Tāmaki Makaurau kia tūhonotia ai ā mātou whakamaheretanga waka ki ngā whāinga a Te Kaunihera o Tāmaki Makaurau mō te whakamahinga o ngā whenua mō te Future Urban Zone (otirā, te [Silverdale West Dairy Flat Industrial Area Structure Plan](#) me te pokapū o te taone ka tū ki roto o Dairy Flat hei ngā rā ki tua) kia tupu ai ētahi hapori hei ngā rā e tū mai nei e kairangi ana, e kōpiri ake ana hoki, e māmā ake ai hoki te toro ki ngā kōwhiringa mō te hīkoi, mō te kake paihikara, mō ngā waka tūmatanui anō hoki.

He aha ngā kaupapa mauroa e marohi nei mātou?

E tiaki ana mātou i ngā whenua kia āhei ai te whanaketanga o ngā kaupapa waka maha e mauroa ana:

- He ara tere e hou 16km te roa mai i Albany ki Dairy Flat, ā tae atu rā ki Milldale, e pai ai, e kouna ai te rere o ngā waka tūmatanui
- Te whakahounga o ngā ara waka tūmatanui mō te whānuitanga ake o te rohe, me te noho mātāmua o ngā pahi i ngā ara matua, tae atu ki tētahi ara pahi he rite tonu te whakamahia e tūhonotia ai a Ōrewa ki Silverdale
- He ara hīkoi, he ara paihikara hou e 25km ana te roa puta noa i Tāmaki Makaurau ki te Raki
- Ngā whanaketanga ki Te Huarahi Matua 1 (SH1) pēnei i te whakawhānui i ngā wāhi hei whakakapi i te tokomaha ake o ngā tāngata ka nekeneke haere hei ngā rā e tū mai nei, me ngā whakahoutanga o ngā whakawhitinga kei Redvale, kei Silverdale hoki me tētahi whakawhitinga hou ki te Huarahi o Wilks.

Ngā mahi e whai ake nei

Ka arotakengia e mātou ngā whakahokinga kōrero mai, kātahi ka wānanga i tō mātou kaha ki te whakauru atu i ngā panonitanga kua marohitia e pā ana ki ā mātou kōwhiringa pai katoa.

Ko te mahi e whai ake nei, ko te whakaoti i te whakawhānuitanga o ngā whakatewhatewhatanga mō ngā kōwhiringa pai katoa. I roto i te tau 2022, ka haere tonu ngā aromatawai ā-taiao, ā-ritenga hoki mā te hui ki te mana whenua, ki ngā hoa pātui, ki ngā kaupupuri rawa wāhi o te rohe pātata, ki ngā kaihanganga me ngā kiripānga matua o te hāpori. Ka āwhina tēnei i tā mātou whakatau hei whakaū i te huarahi e tika ana.

I tōna tikanga, ka oti te tukanga o te The North Auckland Detailed Business Case hei te pito tōmua o te tau 2023, ā, ka whakatakotohia hei whakaaroaro mā ngā Poari o Auckland Transport me Waka Kotahi i te puku o 2023.

E ahu pēhea atu ana mātou?

E whai ana mātou kia whakaūngia tā mātou kōnae mō te [Pānui ā-Whai Herenga \(NoR\)](#) e tiakina ai ngā whenua e tika ana. Kia oti tēnei, ka whakatakotohia atu ki ngā mana, ki a Waka Kotahi rānei, ki a Auckland Transport rānei. Ko tētahi wāhanga hirahira o te waihanga i tētahi NoR, ko te hui atu ki ērā ka pāngia pea – te hāpori, te mana whenua, ngā pakihi, te kāwanatanga me ngā whakahaere o te hāpori.

Me whai tahua pūtea tonu te nuinga o ngā kaupapa kia pai ai te kōkiritanga. I tōna tikanga, ka āta whakatauhia te whiwhinga o ngā tahua putea e ai ki ngā pae-tawhiti ā-wā mō te whakahoutanga me te tukunga o ngā whenua e Te Kaunihera o Tāmaki i roto i te 10-30 tau e haere ake nei.

Ka whakahāngaitia tā mātou whakamahere ki ngā mahere whenua a Te Kaunihera o Tāmaki, tae

atu ki te rautaki hukihuki o Spatial Land Use Strategy for Dairy Flat and Silverdale me te [Silverdale West Dairy Flat Industrial Area Structure Plan](#) hei tautoko i ngā whanaketanga mō ēnei rohe hei ngā rā e tū mai nei.

Ētahi atu kaupapa waka e panoni ana i a Tāmaki Makaurau ki te Raki

Kei reira kē ētahi kaupapa waka kua tīmata kētia, e whakamaheretia ana rānei hei panoni i a Tāmaki Makaurau ki te Raki. Me āta whakaaro mātou ki te hāngai o ēnei kaupapa ki te tirohanga pae-tawhiti mō Tāmaki Makaurau ki te Raki. Kei roto i ngā kaupapa, ko:

- [Penlink](#) (he huarahi atu anō i waenganui i Whangaparāoa me Te Huarahi Matua 1)
- [Dairy Flat Highway Safety Improvements](#)
- Ko ngā mahi tautoko i ngā wāhi e nōhia ana i ngā rohenga o [Milldale](#) ka utua e Crown Infrastructure Partners (CIP)
- [Waitemata Harbour Connections Project](#) – he rangahau e mātai ana i te āhua ki Rapid Transit Corridor me ngā ara o ngā huarahi matua i waenganui i te pokapū me Albany
- [North Shore rapid transit network](#) – te tūhura i tētahi rongoā tereina e mauroa ana kia tautoko i a Tāmaki Makaurau ki te Raki, kia tūhonotia ai hoki ki ērā katoa atu o te kōtuinga waka o Tāmaki Makaurau
- Mā [Rodney Targeted Rate](#) e utu ngā whakawhanaketanga mō ngā ara hīkoi i waenganui i Te Kura o Dairy Flat me te Rori o Postmans kia haumarua ake ai, kia māmā ake ai hoki te hāereere a ngā tāngata.
- Panmure Basin
- Te Ara o Kepa i te Ngahere
- Te Mutunga o te Ara
- Te tapa ā-tāone